

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
KANTONALNI SUD U ZENICI  
Broj 04 0 K 009984 18 K  
Zenica, 31.12.2020.g.

Kantonalni sud u Zenici, u vijeću sastavljenom od sudije Ismara Jukića, kao predsjednika vijeća, te sudija Emire Džerahović i Adnana Baručije, kao članova vijeća, uz sudjelovanje zapisničara Jasne Pranjić, u krivičnom predmetu protiv optuženog \_\_\_\_\_, zbog krivičnog djela *Ubistvo* iz člana 166.st.1. u vezi sa članom 28. KZ FBiH<sup>1</sup>, kojeg brani po službenoj dužnosti Franjo Marjanović, advokat iz Žepča, optužen po optužnici Kantonalnog tužilaštva broj: T04 0 KT 0020994 15 od 30.05.2018.g. potvrđena od strane ovog suda dana 12.06.2018.g. broj: 04 0 K 009984 18 Kps. dana 31.12.2020.g., u sjednici vijeća održanoj dana 31.12.2020.g. donio je sljedeće

## RJEŠENJE

Obustavlja se krivični postupak protiv optuženog \_\_\_\_\_ a, zbog krivičnog djela *Ubistva* iz člana 166.st.1. u vezi sa članom 28. KZ F BiH, zbog odustanka tužitelja od optužnice.

Na osnovu člana 203.st.1. ZKP-a FBiH<sup>2</sup> optuženi se oslobađa od obaveze plaćanja troškova krivičnog postupka, te isti padaju na teret budžetskih sredstava.

## Obrazloženje

Kantonalno tužilaštvo Zenica je optužnicom broj T04 0 KT 0020994 15 od 30.05.2018.g. koja je potvrđena dana 12.06.2018.g. optužilo \_\_\_\_\_ da je počinio krivično djelo *Ubistvo* iz člana 166.st.1. u vezi sa članom 28. KZ FBiH, a na način da je dana 26.12.2014.g. oko 18<sup>00</sup> sati u Zenici, u prostorijama Kazneno-popravnog zavoda Zenica, iz fitnes sale ponio teg za vježbanje težine od 2 kg, a koji teg je stavio ispod garderobe, za pojas pantalona, pa kada je došao u red za telefonsku govornicu gdje se već nalazio \_\_\_\_\_ a, koji je ispred njega šetao i u vrijeme kada je Nermin bio okrenut njemu leđima, iskoristio taj momenat i desnom rukom iza pojasa izvadio teg, te bez ikakvog povoda i razloga, da bi Nermina lišio života, zamahnuo tegom i bacio teg u pravcu glave Nermina, iako je bio svjestan da udarac ovog tega u glavu kao vitalni dio tijela može lišiti života, to i htio, koji teg je Nermina pogodio u gornji tjemeni dio glave, od kog udarca je Nermin pao na koljena, na koji način je zadobio lake tjelesne povrede u vidu krvnog podliva tkiva mekog oglavka središnje – gornjeg tjemenog predjela glave, nakon čega je \_\_\_\_\_ pobjegao sa mjesta događaja i bježeći povikao: „Upomoć, ubio sam \_\_\_\_\_“, dakle, drugog pokušao lišiti života, čime je počinio krivično djelo *Ubistvo* u pokušaju iz člana 166.st.1. u vezi sa članom 28. KZ FBiH.

Glavni pretres u ovoj krivičnoj zakazan je za dan 31.12.2020.g. na koji nije pristupio uredno pozvani optuženi, odnosno nije priveden od strane sudske policije jer se trenutno nalazi na izdržavanju kazne zatvora u Zavodu za izvršenje krivičnih sankcije, pritvora i drugih mjera BiH.

Podneskom Zavoda za izvršenje krivičnih sankcije, pritvora i drugih mjera BiH, Načelnik službe za zdravstvenu zaštitu od 31.12.2020.g. sud je obavješten o nemogućnosti dovođenja optuženog \_\_\_\_\_ na glavni pretres zakazan za dan 31.12.2020.g.

Kantonalno Tužilaštvo Zenica je podneskom broj T04 KT 0020994 15 od 31.12.2020.g. odustalo od optužbe.

<sup>1</sup> Krivični zakon F BiH ("Sl. novine F BiH" broj: 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17)

<sup>2</sup> Zakon o krivičnom postupku F BiH ("Sl. novine F BiH" broj: 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13, 59/14 i 74/20)

Odredbom člana 17. ZKP-a FBiH propisano je da se krivični postupak može pokrenuti i provesti samo po zahtjevu nadležnog tužitelja.

Odredbom člana 298. tačka b) ZKP F-a BiH propisano je da će sud donijeti presudu kojom se optužba odbija ako tužitelj od započinjanja pa do završetka glavnog pretresa odustane od optužnice.

Naime, iz citirane zakonske odredbe proističe da tužilac ima pravo da raspolaže zahtjevom, te da može odustati od krivičnog gonjenja od započinjanja do okončanja glavnog pretresa, kao i u drugostepenom postupku, bez zakonske obaveze obrazlaganja svog odustanka.

Saglasno principu akuzatornosti, krivični postupak se može voditi samo ako postoji zahtjev tužioca, bez obzira o kojem stadiju krivičnog postupka se radi, te je u procesnoj situaciji kada tužilac odustane od optužnice sud dužan donijeti presudu kojom se optužba odbija.

Kada do odustanka tužitelja od optužnice dođe poduzimanjem radnje podneskom ili na zapisnik ali izvan glavnog pretresa, dakle bez prisustva optuženog, sud ne može donijeti presudu kojom se optužba odbija jer se presuda može donijeti samo nakon održanog glavnog pretresa na kojem je bio prisutan i optuženi.

U nastaloj procesnoj situaciji, kada je do odustanka od optužnice došlo podneskom nadležnog Kantonalnog tužilaštva Zenica broj T04 KT 0020994 15 od 31.12.2020.g., sud može donijeti rješenje kojim se postupak obustavlja.

Ovakav stav proizilazi i iz rješenja vijeća Apelacionog odjeljenja Suda BiH broj X-KŽ-06/282 od 10.05.2013.g. objavljeno u Zbirka sudskih odluka iz krivičnopravne materije, knjiga treća, Sarajevo 2019.g.


Ovakvo pravosnažno rješenje ima karakter presuđene stvari.

Zbog svega navedenog sud je odlučio kao u izreci rješenja.

Budući da je doneseno rješenje kojim se postupak obustavlja, sud je primjenom odredbe člana 203.st.1. ZKP-a FBiH odlučio da troškovi krivičnog postupka padaju na teret budžetskih sredstava.

Zapisničar

Jasna Pranjić



Sudija

s.r. Ismar Jukić

tačnost prepisa ovjerava-povrduje  
Predsjednik vijeća, sudija

OVLAŠTENI RADNIK SUDA

*J. Pranjić*

**PRAVNA POUKA:**

Protiv ovog Rješenja može se izjaviti žalba

Vrhovnom sudu FBiH u roku od 15 dana od dana prijema rješenja.

Žalba se podnosi putem ovog Suda u 3 primjerka.